



Jessie 手記

恪守「Work Hard! Play Hard!」原則，城中活動表演、名人飯局、展覽開幕，逢請必到，逢到必早！

奧斯卡熱潮席捲馬會 馬時亨施文信大玩自拍

賽馬會獎學金頒獎典禮暨畢業同學的晚宴早前在跑馬地馬場舉行，Jessie 有幸出席這個人才鼎盛的聚會，當晚除了馬會主席施文信、董事周永健、李家祥、行政總裁應家柏外，更邀得馬時亨擔任演講嘉賓，場面非常熱鬧。

馬時亨席間分享自己當年入讀港大，申請到政府資助及借貸時，媽媽高興得以為他獲頒獎學金。他還自爆畢業當年獲學院推薦為傑出學生，有機會與當時大學校監、亦即前港督麥理浩爵士見面，其中一位傑出學生誤以為馬亦是以一級榮譽畢業，但其實他只是三級。馬時亨話當年獲推薦可能因為自己一直積極參與課外活動，並非靠學業成績。他鼓勵同學想成功要具備四大要素：熱誠、夢想、毅力及保持謙遜，最重要是要有一顆回饋社會的心。

理大發現太空艙？

最近每次經過理大，Jessie 都被一座外形獨特的建築物吸引。聽理大學生講，原來這是由獲獎無數的著名建築師 Zaha Hadid 設計的賽馬會創新樓，由馬會捐助超過港幣 2 億元興建。

Jessie 仲八到，馬會主席施文信在大樓開幕當日，同 Zaha 雞啄唔斷，又大讚大師的設計具前瞻性，指創新樓既似一艘降落香港的太空駕駛艙，又似一艘邁向未來的船舶，逗得 Zaha 笑到合不攞嘴，看來會計師施文信同建築師都幾啱 key。



外型獨特的賽馬會創新樓由名建築師 Zaha Hadid 設計。（圖片由香港理工大學提供）



國際影星在奧斯卡頒獎禮的自拍照在網上瘋傳，同學仔都有樣學樣，帶備「自拍神器」同嘉賓大玩自拍，一眾「大人」齊呼好玩！

名嘴阿旦、「風之后」李麗珊任足球領袖計劃導師

馬會與曼聯一直合作無間，Jessie 最近又見他們有新搞作，今次仲搵埋東華三院，推出「賽馬會青少年足球領袖計劃」，提升年輕人的組織和領導才能，為社區培育新一代青年領袖。計劃更找來「風之后」李麗珊及名主持「阿旦」鄭丹瑞做星級導師，與學生分享寶貴經驗。席間李麗珊透露原來年輕時曾被人勸唔好做全職運動員，因為「搵唔到食」，但她沒有放棄，更堅毅不屈地向目標邁進，否則香港不會有這位奧運金牌得主誕生。

這個嶄新項目會先在北區、元朗及南區推行，入選的 50 位青少年會參與足球訓練及品格發展工作坊；表現優秀的六名學員更可於暑假期間去曼徹斯特交流。Jessie 如果後生幾十年，都會報名參加！



「風之后」李麗珊獲委任為計劃導師，與年輕人分享堅毅不屈的運動員精神。

應家柏落村派福袋 用廣東話睇老友記

Jessie 聽聞馬會最近夥拍新界鄉議局推出鄉郊長者探訪計劃，安排義工走訪全港 700 多條鄉村探訪獨居長者。最難得是馬會行政總裁應家柏亦身體力行，早前到元朗新田鄉探訪長者兼大派福袋，更親切地以廣東話同「老友記」打招呼：「早晨！我係應家柏！」德國人應家柏話自己居港 16 年，係第一次到訪新界鄉村，探訪後亦順道遊覽鄰近新田鄉的逾百年歷史名勝「大夫第」，認識新界歷史同文化習俗。

講返個探訪，馬會送給「老友記」的福袋內，除了有米、油、麥皮外，仲專登挑選配有放大鏡的指甲鉗及由馬會義工親身製作的福字掛飾，夠晒貼心。



馬會行政總裁應家柏（右一）用廣東話讚婆婆的手鏈「好靚」，睇到婆婆眉開眼笑，捉實應家柏手仔講「釘橋（thank you）」。旁為元朗新田鄉事委員會主席文志雙（左一）。

大忙人高永文馬場幫施文信量血壓

相信食物及衛生局局長高永文醫生這位大忙人已很少幫人診症，但早前 Jessie 在沙田馬場就見他親自為馬會主席施文信量血壓！莫非賽事太刺激令施文信血壓急升？非也，兩位大忙人只是為配合今年社群盃「醫藥衛生」的主題搞搞氣氛而已。高醫生加入政府後再沒有行醫，但量血壓的技巧，尤其用起傳統泵氣血壓計仍然熟手；未知高醫生會否想起昔日行醫日子？

馬會當天更宣佈撥捐約港幣 2 億 5 千萬元，與醫管局合作推行「賽馬會安寢輕移計劃」，為公立醫院病房加設 520 多套吊運系統及安裝 6,000 多張電動病床。施文信話呢筆係馬會捐予醫管局有史以來最大筆的單一捐款，難怪一眾醫護界猛人如梁智鴻、胡定旭、梁智仁、梁栢賢、周一嶽、梁卓偉、陳肇始等齊齊現身撐場。



高永文（前排右）為馬會主席施文信（前排左）量血壓。後排左起：馬會行政總裁應家柏、醫管局行政總裁梁栢賢、主席梁智仁及馬會慈善事務執行總監蘇彰德律師。

星級食家聚首

細味馬會射鵰英雄宴

Jessie 經常出席大大小小飲宴，有時都會食到悶，但早排獲馬會邀請試食「射鵰英雄宴」就眼前一亮！沙田會所凱旋廳找來名廚尹達剛搞搞新意思，以武俠小說經典《射鵰英雄傳》的人物及情節創作九道菜式，當中包括「黃藥師桃花島海鮮匯」、「郭靖手抓蒙古乳羊」、「歐陽鋒蛇膽酒炆鹿筋刺參」及「洪七公幫主一品雞」等。

與 Jessie 同場出現的有前助理廣播處長張文新及太太車淑梅、股評人「青姐」胡孟青、香港首位華人女騎師江碧蕙、資深食評家及跨界傳媒人梁家權、才子林超榮、名模楊煒、楊英偉及彭晴等星級食家。大家一邊品嚐美食，一邊聽著尹師傅介紹每道菜式如何與經典名著 crossover，可說是雙重享受！



張文新（左）及太太車淑梅（右）出席馬會與尹達剛師傅（中）合辦的射鵰英雄宴。



馬會董事周永健（中）、教統會主席鄭慕智（右）與青協總幹事王葛鳴（左）以無伴奏合唱《I believe I can fly》，完全無難度。

馬會周永健 x 教統會鄭慕智 x 青協王葛鳴 無伴奏合唱技驚四座

音樂是世界共通語言；近年流行無伴奏合唱（a cappella），幾把人聲便可唱出一首首悠揚悅耳的歌曲。Jessie 早前便到了伊館欣賞「2014 香港青年協會賽馬會香港國際無伴奏合唱節」，驚訝原來馬會董事周永健、教統會主席鄭慕智與青協總幹事王葛鳴都是「唱得之人」，三人跟來自英、美、日及本地的唱家班，以 a cappella 合唱著名黑人 R&B 歌手 R. Kelly 名曲《I believe I can fly》打響頭炮，在場人士個個拍爛手掌。

「a cappella」越來越受歡迎，Jessie 同馬會公關傾計更發現，原本為期一年的「賽馬會無伴奏合唱教育計劃」，因參加人數比預期超出一倍，吸引近 3 萬人參加，所以馬會再度撥款，將計劃延長多三年。計劃更推出免費手機應用程式「app-cappella」，令無伴奏合唱愛好者可以隨時運用拍子機及調音笛練歌，想唱就唱。